

21/12/2000

Dzaiddin berazam kembalikan keyakinan

KUALA LUMPUR, Rabu - Ketua Hakim Negara yang baru, Tan Sri Mohamed Dzaiddin Abdullah berazam untuk mengembalikan keyakinan rakyat negara ini terhadap badan kehakiman.

Beliau, yang menerima watakah pelantikan daripada Yang di-Pertuan Agong Sultan Salahuddin Abdul Aziz Shah di Istana Negara hari ini, berkata bagi mencapai matlamat berkenaan, tugas utamanya ialah meletakkan badan kehakiman dalam keadaan sempurna.

"Ini hanya dapat dicapai menerusi interaksi, perbincangan, perundingan dan saling menghormati di kalangan hakim. Pada masa lalu, semua ini kekurangan dan kepemimpinan tidak kelihatan sampai ke bawah.

"Saya akan tunjukkan corak kepemimpinan saya," kata Dzaiddin dalam satu temuramah di pejabatnya.

Dzaiddin, 63, yang menggantikan Tun Mohamed Eusoff Chin, mengangkat sumpah memegang jawatan dengan disaksikan Perdana Menteri, Datuk Seri Dr Mahathir Mohamad dan Menteri di Jabatan Perdana Menteri, Datuk Dr Rais Yatim.

Pelantikan itu, yang berkuat kuasa hari ini diputuskan pada Mesyuarat Majlis Raja-Raja ke-187 November lalu.

Sementara itu, dalam kenyataannya, Mohamed Dzaiddin berkata, beliau akan menemui hakim di seluruh negara untuk membentangkan cadangannya bagi membaiki keyakinan orang ramai terhadap badan kehakiman dan pentadbiran mahkamah.

Katanya, dalam tempoh dua tahun perkhidmatannya, beliau mempunyai banyak kerja untuk membaiki kerosakan yang dialami badan kehakiman.

"Tugas utama saya adalah memperbetulkan kerosakan itu dan cuba memperbaiki perkhidmatan yang diberikan kepada orang ramai dengan mengurangkan kelewatan memproses kes, mengurangkan kes tertunggak serta menjadikan mahkamah lebih mudah didekati.

"Orang ramai mengharapkan pentadbiran mahkamah akan berfungsi dengan lebih baik dan mahkamah menjadi lebih cekap. Saya juga berharap mengadakan hubungan lebih rapat dengan Majlis Peguam Malaysia bagi kepentingan pentadbiran mahkamah," katanya.

Mohamed Dzaiddin berterima kasih kepada Dr Mahathir, atas nasihatnya kepada Majlis Raja-Raja melantik beliau menjadi Ketua Hakim Negara yang baru.

Anak kelahiran Arau, Perlis itu mendapat pendidikan awal di Sekolah Melayu Arau kemudian di Kolej Sultan Abdul Hamid di Alor Star.

Beliau pernah menjadi wartawan akhbar The Malay Mail dari 1956 hingga September 1957 sebelum bertukar kerjaya sebagai inspektor polis dalam Cawangan Khas.

Mohamed Dzaiddin meninggalkan bidang berkenaan untuk melanjutkan pelajaran dalam bidang undang-undang di England pada 1962.

Kerjaya beliau dalam bidang perundangan bermula selepas diterima menjadi peguam di England pada 19 Julai 1966 dan di Malaysia pada 28 Januari 1967.

(END)